

紀遺

古有野史稗官紀載遺事然或出於寓言不盡爲傳信也志則貴言文而事核遺而紀之奚居蓋瑣屑纖微動關人情物理離奇變幻不外往屈來伸至可喜可欣可驚可愕之端雖若出於意計所不及而要皆天地間所不能無矧循良騷雅名閨方外一二軼事殘篇掛人齒頰歷久常新按類而節錄之並補其所缺遺不徒以資談助亦必有因之而激昂感慨者矣志紀遺

紀遺

俱本府志其有別採者註明

學使王世懋閩部疏曰閩西諸郡民皆食山自足爲舉子業不求甚工漳窮海徼其人以業文爲不貲以舶海爲恒產故文則揚葩而吐藻幾埒三吳武則輕生而健鬪雄于東南無事不令人畏也又云漳人既業文原多習武民間儒童每歲大舉比蠅集省下覬所謂大續遺才者不得留以就武試又材官多能操觚伸紙作經生語故榜出五十人大半是漳人也

漳郡七屬相去止二百餘里而種藝氣候不同近郡早禾率播清明漳浦則立夏詔安則近小滿矣惟晚禾俱在立秋節然亦有先後也

謹按早禾雲霄以立夏

夏播插居多亦有在清明者

漳文儒多寒素以舌耕爲業未嘗客遊居幕老守一經雖淡薄恬如也同志重文社多者數十人少者十數人按期拈題呈能負勝雖窮鄉僻壤亦彙集郵致以証先輩竟以此爲樂事焉

雲霄廳志

卷二十 紀遺

二

俗有無爲教以朔望爲期曰菜期集男女燒香拜佛夜聚曉散伴脩善事人競惑焉廷尉陳公汝咸知漳浦時有教頭女某氏者犯姦事覺按其罪盡籍在縣經堂改爲育嬰堂行臺館舍驅諸從教者士論譴之

公有杖毀

東嶽鬼卒事見祀典又有驅逐西洋教主出境事謹按雲霄南門外經堂現已改爲小隱寺餘一二處亦只萊公相沿吃齋奉佛無敢集男女聚會者

嘉靖三年鴿鳥價值百金先是有鴿自中州來者菊冠紫衣首尾純素號曰四停花以黑綠爲上紅紫爲次品色名號不一人爭尙之初僅值一二金長至十數金已而潮人售之轉相誇艷價益沸湧貪夫販子競傾貲以購得爲幸雖厲禁不止也其後物極而變禁行鴿死人人喪貲有數百資之產一旦漸盡者近日浮蕩子弟多鬪鷓鴣畫眉以相勝負價甚高鷓鴣尤多卽此類也

崇禎間民爭養白兔每對價數十金婦女亦鬻其環瑱以市睡以木棉飼以生菜如養兒然半載餘價忽賤遂有傾家者所謂獸妖也俗婦女無貴賤皆稱孺人相傳宋楊太后過此無聊欲召見諸婦衆以

無品秩辭乃闔漳邑盡賜孺人明日各赴行在謝恩故今相沿不改

見浦志雲

霄所稱亦同

浦人行聘常禮之外必用荖葉檳榔以當果疏二物非浦產浦人用之似無謂或曰荖取偕老檳榔取與郎相敬如賓又以糖為牌女家報以麵棗牌形方棗形圓陰陽相答之義也

浦邑志

泉漳間燒山土為瓦皆黃色郡人以海風能飛瓦奏請用筒瓦民居皆儼似黃屋鴟吻異狀官廨縉紳之居尤不可辨

見閩部疏雲霄亦然

右民風

國初沿明季陋習佃人納稅之外又納租故有一業兩主之名經當道禁革已無其名偶有民田而帶祠廟租者則以供香火費故存之然近有佃戶糞土之說藉上下承耕之例踞佃匿畝抗稅代耕百弊叢生業主文弱竟不得主持空輸

國課刁風亟當禁絕

謹按佃戶糞土之說係偶強私相授受藉此挾制業主不得召佃以遂其拖欠租稅之計此所以有良田不如良佃之謠非有鋤強扶弱之官長宿弊總難廓清

雲霄廳志

卷二十 紀遺

三

右賦役

海濱築陂為田其名曰埭初築未甚種藝則蓄魚蝦其利亦溥越三五載漸墾為田斥鹵未去宜鹹水允稻其穗鬚長毳毳如髮能耐水浸米色赤數十年後成熟耕始早晚二收云

漳地田禾秀實時多小白蝶為害故農人多豫蓄烟草梗以防其患截而團之按科斜插稻根下蝶不敢近或曰南灣山中有白蝶洞若芒種前遇南風則羣蝶飛出宿田疇卵育滋生所在多有無風則否今亦不敢信其必然蝶似燈蛾而小聚稻莖葉則立枯不能華實惟烟草梗足以治之也

謹按年來蝶尤盛早允皆當插烟莖農民苦之

近山之民藉種植管子所謂十年之計在於樹木也故有種竹者杉者松者茶者効遲而利大也如薑如芋如王梨甘藷一歲之入亦足以供數口

謹按雲霄自數十年來潮民導種扶留藤以竹為籬以杉為蔽深山窮谷皆培竹木以待時需為利甚溥

漳地負山阻海田疇稀少濱海以魚為生嘗於秋仲及春末乘小艇破

巨浪至青水邊下網引網而歸所獲滿載名曰牽風其絕流而漁者編竹者曰截箔豎木者曰掛桁又有釣者罾者撒網者敲觚者跳仔者駕小舟敲木魚響徹波濤魚卽驚躍入舟中者曰敲觚以粉塗舟旁于月下發櫂疾行而魚驚跳入舟者曰跳仔謹按舊志取魚之法惟敲觚雲霄所無餘沿江鄉民藉此爲生海中多蜃蛤之利居民恣取不竭燒以爲灰其用最廣可以造宮室可以營宅兆可以築堤堰可以糞田疇較石灰爲更勝也

古林舖

卽雲霄營公于店塘

有老樟樹一株大數十圍相傳淳熙間叢神自名曰卓立

進闈登第先數日到報房親填籍貫且曰報到以三十金爲謝揭榜果有名報至徧詢無章卓立其人者徘徊久之忽于樹下拾得報資折封如數此傳聞之可異者也明正德間厚廣村李旦構庵讀書其下著有松竹梅蘭清幽閒靜八章稱爲絕調

榕之爲樹根盤而凋後材美而蔭廣植物中肩並松栢故地勢空闊之處皆種樹之以護藩牆以蔽風雨蔭可數畝自榕壇作頌而榕村特起

雲霄廳志

卷二十 紀遺

四

榕門繼盛皆離明華滋爲我

國家億萬禩之喬木也中州南浙無之而此獨有諺言榕不過浙此可徵矣纂書者泥草木疏謂理疎不中規矩豈知言哉

深山多虎所至輒有鳥隨之圓眼鈎吻豎兩耳頭如虎似鶴而大聲啣啞不可聽伺所攫產而食其腸謹按雲霄多有此獸爲民害宜招獵戶殲除之

烏山多巨猴嘗於秋月一會千百爲羣叫嘯跳躍遍滿山谷他時見亦罕矣不知聚族何所也

右產物皆本府志

陳少卿汶輝

陳埭人寓詔安

幼博經史尤邃天文地理之學結廬南臯舍有榕樹

一株每講學於其下輒指以語人曰此榕開花當得官一日汶輝到友人茶話門人乘其出門戲剪紅紙作花綴榕樹上汶輝見而喜曰榕開花矣可以出而仕矣居數日洪武詔徵天下人材汶輝與焉遂入試以經明行脩爲天下第一拜吏科給事中轉大理少卿府志

吳文波瑛嘉靖壬子鄉闈主司錄其文擬第一謹藏之及騰榜索之不獲書至十七名始得之因屈居第十八子肖波昭乙丑會試閩狀元陳公瑾分校得其卷以元薦總裁華亭徐公階謂其英華太露欲抑置第六陳執不可留俟後科再閱歲父子同溺水死文人命薄若文波肖波其尤者也而莆美張雲海斐萬曆戊戌會試以阻病擬元不中白塔吳澄字啟蒙萬曆丙辰會試以主試爭元不售皆不能無遺憾云

採張吳二姓家譜補入

右選舉

相傳有過圓子嶺出對偶者曰圓子嶺日日冬至一人答曰燈火山夜夜元宵亦佳對也漳俗皆以冬至日供圓子

本郡邑志

詩經衍義相傳以爲十七都楊氏著楊故老儒生書雖出弗行也乃列江縉雲名氏其上遂大傳布往歲原本尙有列楊氏名者今亡矣

本郡志

閩中郡邑耑習一經者稱漳浦詩雲霄宋則蔡元鼎作詩經解及辨類詩陳景肅作詩疏明則江環作詩經衍義而葉紹京以詩經課藝名先

雲霄廳志

卷二十 紀遺

五

輩著作惜多湮沒

纂浦邑志

南靖黃醒軒授徒古樓道經梁山遇老人自稱梁公邀至其家壁間題句云青青千里草隱隱獨家村日暮夜投宿山深虎守門

府志採列朝詩集互見明詩綜

吳中雲瑄隆慶辛未與兄瑛姪昭同赴會試至渡頭溪舟覆溺焉有西林舟子援之獲生葉梅閣期遠忌其才索舟子責以重板瑄是科登第作對語刺期遠曰天口起狂風掃盡西林落葉雲中開皓日晒乾南閣孤梅以兩人氏號倒裝裁對妙叶自然至今傳誦

採吳氏家譜補入

右藝文

陳王墓一在平和新安里大峯山一在漳浦雲霄將軍山之麓故脩竹里初陳元光葬父政于雲霄後青囊稱茲山有王者氣元光改葬于大峯山以避之後元光戰沒廟食茲土累封王爵故父葬亦稱陳王宣和五年有傭人林機來自泉請于縣令曰陳將軍欲遷峰山瑩還葬雲霄有磚一坎在普賢院後幸命五百工將去時人以爲狂已而發坎果驗

山前人遙望舉畚鍤者數百即之獨有機耳民各携酒食往餉須臾則瓶罄豆空未踰月役畢有吳大成者過雲霄見黃旂前導自峯山直趨舊瑩鹵簿蔽空鼓吹傳響山下人趨視則新墳立矣尋訪舊瑩籐蘿亂覆始知王之遷葬也

右古蹟

本府志

自郡邑至村落輒數十家爲一社建立祖祠以祀其先又各立祠春祈秋報亦猶行古之道考祈報所祈惟玉鈐陳將軍闢土開疆功在生民報祈最盛其餘各方所祀大約能爲民禦災捍患者如各鄉之祀吳真人大帝及天后娘娘皆生而爲人沒而爲神俎豆馨香自當有永至文人祀文昌武人祀關帝術業之宗各有所專至於關帝則通衢市肆所在皆然而天后之祀凡雙船下水則呼爲感應也

本府志

雲霄有天妃宮按天妃莆田人宋巡檢林愿女也幼時談休咎多中能坐席亂流而濟衆稱神女常衣朱衣飛翻海上扶持舟楫傾危屢著

雲霄廳志

卷二十 紀遺

六

威靈明永樂間封爲護國庇民妙靈昭應宏仁普濟天妃 國朝改封天后閩廣海船皆祀香火舟當沉溺見有火光衝空而去或火住桅上須臾復返則舟便無恙其神異如此

和邑志

右祀典

漳傍海地多瘠鹵仰給粵潮商粟以爲常嘉靖己未倭寇海滄月港諸邊潮船不至巡海邵梗患之移文潮郡督趨粟船乃通凡船至必於水陸縮穀之處有巨猾連結富室賤價括糴俟船既去乃遽騰其價雜沙土售人潮船復相戒不入境梗廉得其尤者置之法商船聞風復來

謹按雲霄

乾隆丙午丁未間旱荒時有米船從浙粵來各口岸需索陋規不得入境致斗米千文饑民輾轉邵公遺愛真令人奕世不忘矣

右宦績

本府志

宋少帝舟覆崖山陳恪殉難前一夕作崖山六咏詩云戰艦衝風起怒濤北船曉挫暮尤多強胡難滿吞天慾志士橫羅伏海號一劍掛腰隨我去萬方引領奈君何

豪歌兩韻不通韻字疑誤

其詞慷慨多類此兄陳植字玉澗封郡

馬著玉潤宏詞十二篇微旨不能盡述又其姊陳碧娘作平元曲寄二弟云虎頭將軍眼如電領兵夜渡龍舟堰良人懸腰大羽箭廣西畧地崖西戰十年消息無鴻便一紙憑誰寄春怨日長花柳暗庭院斜倚粧樓倦針線心懷良人幾時見忽覩二郎來我面植兮再吸傾六罐格也一彈落雙燕何不將我張郎西協義維舟同虎帳無術平元報明主恨身不是奇男子倘妾當年未嫁夫請效明妃和西虜虜人不知肯我許我能管弦猶長舞二弟慨然舍我去日覩江頭淚如雨幾回聞鷄幾濱死未審良人能再覩此詩慷當以慨有烈丈夫氣志府湯燦伯歿死未婚妻流洋村李氏晨粧對鏡見背後有人峩冠藍襖謂之曰余汝夫也回顧不見俄而訃至氏以身殉父母哀之延僧禮佛超度有鴛鴦匹偶飛入經壇聽講三晝夜壇徹雙飛而去明永樂間事也在天願爲比翼鳥在地願爲連理枝可爲斯咏

右列女

林偕春督學兩浙時會稽陶望齡因歲考不與補試之日攜斗酒入悠然獨酌若不以試事爲意者日將夕矣尙沉醉未醒也堂吏以告偕春曰此異士也姑聽之望齡酒醒磨墨數回洒然下筆偕春不待完篇取稿視之曰吾固知異士也取冠首名之上旣而魁南宮偕春見人文字能知一生禍福嘗按試一州當簪掛時一二等諸生畢集偕春謂曰若輩文章雖勝然福分不及于四五等者多矣往例三等以下諸生得先歸肄業惟二等以上候學使行道旁揖送歸之日值颶風大作沉舟死者無數邑志又載西林蔡元岡思充分校會闈得士倪鴻寶元璐蔚爲首選人服其精鑑而薛欽字士彥識李愚公亦稱巨眼云志郡邑

鄉先生多夙慧科甲眉壽亦往往有之吳窠十八登進士而亨眉壽者張士良九十餘湯應科薛士彥陳天達俱八十餘其祖孫父子兄弟科甲蟬聯者亦不乏人吳顯吳窠父子進士葉期遠葉紹京祖孫進士吳原吳震吳泰兄弟三科甲張問明張斐張天維三世科甲吳瑛吳瑄吳

昭父子兄弟三科甲

纂浦
邑志

雲霄吳叅政森與龍溪陳昱同鄉友也昱任仙居訓導森時在浙知其守官清貧常發金於學昱召僚友共之吳之高誼與陳之廉介並足千

古云

纂府
志

右人物

廣傳字心在漳浦陳氏子居雲霄南山寺每值齋糧匱乏輒跪告韋馱隨有負擔來者初不識字後通內典學吟詩順治己亥春自知當死集諸徒衆沐浴更衣登龕趺坐曰吾候道友澤雲來也今到山門矣俄澤雲至卽口占一偈云我欲臨行自出山西歸無礙妙其間靜時寫意從心靜妙解如來證法班語畢而逝異香滿室

本浦
邑志

竹塔廖四陽康熙時人得異人傳授精於醫安溪李相國患肺癰無能治者請回籍四陽藥之而愈相國起用因薦於朝驛致入太醫院中途有投誠任總戎者其女與僮私有孕托疾不起父延醫診視力以遠嫌

雲霄廳志

卷二十 紀遺

八

辭適四陽至總戎爲言之四陽曰是可取朱絲繫其脉牽餘線出房外按之則病症可知矣總戎喜如其教四陽未暇問其爲處女爲嫁婦也診視後爲總戎賀曰是將一產而得二男總戎失色四陽退拔劍入房剖女腹見兩胎焉出謝四陽四陽痛自引咎於是佯狂而歸舉醫書焚之故其方多不傳

探廖氏家
譜補入

右方伎

考疑附

正德志載羅良總制府事時陳君用爲同知分治漳浦築西林城以居有虎渡人蘇氏女名妙娘美姿色君用議娶爲妻良欲爭娶爲妾後妙娘卒歸君用良怒遣舟師攻之君用力不能支乃出城求救于潮中道遇害妙娘猶調人馬拒守舟人飛矢入城曰急出蘇妙娘不然城破男女無少長皆屠之君用部下有吳福賜者語衆曰羅氏所欲蘇妙娘而已今君用已死吾爲誰守因共出妙娘歸之城賴以全攷紀畧諸書君

用先爲良屬縣吏後爲總制府同知與良同僚及查君用譜良以女妻其子海生良城破身亡之後止有夫人陳氏死節林登州劉愛禮爲良夫婦立傳無妙娘事考盧志又言君用李志甫之婿且邑志稱君用歷官萬戶侯階南勝伯至正丙午年始卒今前志乃云爲同知時遇害考之前後皆不合前志蓋傳疑也又元史有陳君用元初延平人以禦寇力戰死非此君用前人多誤引之

郡邑志